

P R A V I L N I K
O ČLANSTVU U ISLAMSKOJ ZAJEDNICI
BOSNE I HERCEGOVINE -
MEDŽLISU ISLAMSKJE ZAJEDNICE
BOSANSKA DUBICA

Bosanska Dubica, 2024. godina

Na osnovu člana 40. Ustava Islamske zajednice u Bosni i Hercegovini i člana 34. Pravilnika o radu medžlisa i džemata IZ u BiH, Izvršni odbor Medžlisa Islamske zajednice Bosanska Dubica, na svojoj I redovnoj sjednici, održanoj dana 19. 01. 2024 . godine u Bosanskoj Dubici, usvojio je

P R A V I L N I K
o članstvu u Islamskoj zajednici Bosne i Hercegovine -
Medžlisu Islamske zajednice Bosanska Dubica

DIO PRVI - OPĆE ODREDBE

Član 1.
(Predmet reguliranja)

Ovim Pravilnikom reguliraju se sljedeća pitanja:

- a) članstvo u Islamskoj zajednici - Medžlisu Islamske zajednice Bosanska Dubica (u daljem tekstu: Medžlis),
- b) način utvrđivanja iznosa članarine,
- c) provođenje Pravilnika i nadzor nad provođenjem,
- d) revizija i
- e) druga pitanja od značaja za Medžlis.

Član 2.
(Značenje pojmova)

Određeni pojmovi u smislu odredaba ovog Pravilnika imaju sljedeća značenja:

- a) članarina predstavlja novčani iznos koji su obveznici plaćanja članarine dužni redovno uplaćivati u korist Medžlisa u skladu sa odredbama ovog Pravilnika,
- b) članom Islamske zajednice smatra se lice ili obveznik plaćanja članarine koji redovno uplaćuje članarinu u korist Medžlisa u skladu sa odredbama ovog Pravilnika,
- c) domaćinstvom se smatraju sve osobe koje zajednički stanuju u jednoj stambenoj jedinici. Jedinica stanovanja može biti kuća, stan, pokretna kuća, nekoliko spojenih soba ili samo jedna soba u kojoj neko stanuje odvojeno od ostalih. Domaćinstvo može imati samo jednog člana, nekoliko članova ili više porodica koje žive zajedno ili bilo koja grupa ljudi u srodstvu ili ne, koji dijele životni prostor,
- d) porodicom se smatra grupa lica objedinjenih krvnim srodstvom ili bračnom vezom koji zajednički žive, (suprug-nosilac članarine, supruga, djeca)
- e) redovno plaćanje članarine podrazumijeva plaćanje članarine u jednakim mjesečnim iznosima tokom cijele godine ili plaćanje jednokratnog iznosa članarine za cijelu godinu,
- f) licima koja se prvi put učlanjuju smatraju se lica koja se učlanjuju u prvoj godini računajući od dana nastanka obaveze članstva u Medžlisu,

g) registar obveznika plaćanja članarine je jedinstvena baza podataka o licima na koja se odnosi obaveza plaćanja članarine u skladu sa odredbama ovog Pravilnika, što uključuje osnovne podatke o licima, vremenu nastanka obaveze, podatke o izmirivanju obaveza prema Medžlisu i druge relevantne podatke.

h) članarina nije nasljedna kategorija

i) nakon smrti nosioca članarine obaveza plaćanja iste prelazi na njegovog supružnika ili krvnog srodnika (sin, kći) koji nisu po odredbama ovog Pravilnika stupili u brak i ne može preći na druga lica,

j) članarina nakon smrti člana važi godinu dana a u slučaju da je obveznik članarine do smrti živio sam, njegovi srodnici na njegovu članarinu, mogu da mu organizuju godišnjicu.

Član 3. (Centralizacija)

Obaveza članarine na području Medžlisa organizira se u okviru jedinstvenog sistema centralizacije članarine u skladu sa posebnim aktima Medžlisa.

DIO DRUGI - ČLANSTVO U MEDŽLISU

Član 4. (Obaveza članstva)

(1) Član Islamske zajednice je njezin pripadnik koji prihvati članstvo u Islamskoj zajednici i izvršava propisane obaveze na temelju čega se evidentira u matičnu evidenciju članova kod medžlisa.

(2) Svi muslimani koji su trajno nastanjeni na području Medžlisa obavezni su biti članovi Medžlisa u skladu sa odredbama ovog Pravilnika.

(3) Obaveza iz stava (2) ovog člana odnosi se i na muslimane sa područja Medžlisa koji privremeno ili trajno žive u inostranstvu ili u drugom mjestu u Bosni i Hercegovini van područja Medžlisa, a koji na bilo koji način ostvaruju svoja vjerska prava i obaveze na području Medžlisa ili koji su na bilo koji način vezani za područje Medžlisa u društveno - ekonomskom smislu ili koji na području Medžlisa posjeduju ili su vlasnici stana, kuće ili drugog i oni koji se žele ukopati u haremima na području Medžlisa.

(4) Članstvo i članarina se plaća po porodici.

(5) Vrijeme nastanka obaveze plaćanja članarine je stupanje u brak.

(6) Ako više porodica žive u zajedničkom domaćinstvu obaveza plaćanja članarine odnosi se na svaku porodicu pojedinačno.

(7) Članstvo u Medžlisu se stiče učlanjenjem i redovnim plaćanjem članarine.

(8) Članstvom domaćina porodice obezbjeđeno je i članstvo za njegovog supružnika, maloljetnu djecu, djecu na redovnom školovanju, djecu-neoženjene članove porodice bez zaposlenja koji nisu stupili u brak.

(9) Punoljetni muslimani koji su stupili u bračnu zajednicu trebaju biti članovi Medžlisa bez obzira da li žive skupa sa svojim roditeljima ili ne.

(10) Punoljetni muslimani i muslimanke koji su zaposleni a nisu stupili u brak mogu biti dobrovoljni članovi Medžlisa.

(11) da se pridržava islamskih normi, štiti islamske vrijednosti i čuva islamske običaje

(12) da poznaje i primjenjuje propise Islamske zajednice

(13) da čuva ugled i jedinstvo Islamske zajednice

Član 5. **(Plaćanje članarine)**

- (1) Članarina u Islamskoj zajednici je novčani iznos koji se plaća kod nadležnog medžlisa.
- (2) Iz članarine proizilaze prava i obaveze regulisane ovim pravilnikom i pravilnicima drugih organa Islamske zajednice.
- (3) Članarina se mora uplaćivati redovno.
- (2) Ako obveznik plaćanja članarine istu ne plaća shodno odredbama stava (1) ovog člana Izvršni odbor Medžlisa može odlučiti da se iznos članarine uveća za one obveznike koji ne izmiruju redovno svoje obaveze prema Medžlisu.
- (3) U slučaju iz stava (2) ovog člana Izvršni odbor će donijeti posebnu odluku.
- (4) Članarina se uplaćuje na blagajni Medžlisa, prilikom naplate članarine licu koje je uplatilo odmah se izdaje dokaz o uplati (evidencija uplata vrši se na uplatnici, kartonu, knjižici i u elektronskom formatu).
- (5) Izvršni odbor će posebnom odlukom utvrditi prava i dužnosti lica koja prikupljaju članarinu za Medžlis.
- (6) Članarina se može platiti unaprijed po iznosu članarine u tekućoj godini, a zaostala članarina se također plaća u visine članarine u tekućoj godini.
- (7) Član Islamske zajednice može biti član i plaćati članarinu i u više medžlisa.
- (8) Plaćanjem članarine, članovi islamske zajednice omogućavaju izvršavanje obreda i drugih aktivnosti u džamijama, kako slijedi:
 - a) dnevni namazi,
 - b) džuma namaz,
 - c) bajram namazi,
 - d) teravih namaz,
 - e) mektebska nastava za djecu,
 - f) ostali vidovi vjerske edukacije,
 - g) svečanosti u džamijama,
 - h) te drugi vjerski programi u džematu.

Član 6. **(Prava i usluge)**

Pored prava iz člana 5. tačka 8. ovog pravilnika, u medžlisu u kojem je upisan u matičnu evidenciju, član ostvaruje i sljedeća prava i usluge:

- a) da učestvuje u izborima u Islamskoj zajednici, da bira i bude biran, u skladu sa propisima Islamske zajednice
- b) da učestvuje u radu organa Islamske zajednice, kroz džematsku skupštinu i druge organe u koje bude izabran
- c) da može aktivno učestvovati u džematskim aktivnostima, koje organiziraju organi i službenici Islamske zajednice
- d) da se može obraćati organima Islamske zajednice radi zaštite svojih vjerskih prava
- e) da mu se klanja džemaza namaz i obavi učenje na kaburu od strane jednog imama.

Član 7.
(Jednakost)

Medžlis će svim obveznicima iz člana 4. ovog Pravilnika omogućiti sticanje statusa člana Medžlisa pod jednakim uslovima u skladu sa odredbama ovog Pravilnika.

Član 8.
(Status člana)

- (1) Status člana Medžlisa stiče se učlanjenjem u skladu sa odredbama ovog Pravilnika.
- (2) Ukoliko član Medžlisa ne izmiruje svoje obaveze prema Medžlisu tri godine uzastopno, gubi status člana Medžlisa.
- (3) Lica iz stava (2) ovog člana mogu se ponovo učlaniti u Medžlis. U tom slučaju navedena lica moraju platiti sve neizmirene obaveza prema Medžlisu.

Član 9.
(Lica koja se prvi put učlanjuju)

- (1) Lica koja se prvi put učlanjuju u Medžlis, a koja prije toga nisu bila obveznici plaćanja članarine, obavezni su platiti članarinu za tekuću godinu.

Član 10.
(Registar obveznika)

- (1) Svi džemati na području Medžlisa obavezni su ažurno voditi registar obveznika plaćanja članarine Medžlisa sa područja džemata.
- (2) Medžlis je dužan ažurno voditi centralni registar obveznika plaćanja članarine sa područja Medžlisa na osnovu podataka iz stava (1) ovog člana.
- (3) Sve promjene u registrima iz stava (1) i (2) ovog člana nadležni subjekti obavezni su evidentirati u registrima u roku od 30 dana od dana nastanka promjena.

Član 11.
(Usluge Islamske zajednice)

- (1) Organima i službenicima Medžlisa zabranjuje se izvršavanje bilo koje usluge Medžlisa licima koji su obveznici plaćanja članarine ukoliko nisu izmirili svoje obaveze prema Medžlisu u skladu sa odredbama ovog Pravilnika.
- (2) Usluge iz stava (1) ovog člana mogu se izvršiti tek nakon što obveznik plaćanja članarine izvrši sve obaveze prema Medžlisu u skladu sa odredbama ovog Pravilnika i posebnih akata Medžlisa.
- (3) Službenik ili drugo ovlašteno lice Islamske zajednice može izvršiti uslugu obvezniku plaćanja članarine tek nakon što se dokaže da navedeno lice redovno izmiruje obaveze prema Medžlisu u smislu odredaba ovog Pravilnika i drugih posebnih akata Medžlisa.
- (4) Ako lice koje traži uslugu Medžlisa nije redovno uplaćivalo članarinu u skladu sa odredbama ovog Pravilnika, a nije izgubilo status člana Medžlisa, pravo na uslugu Medžlisa može ostvariti tek nakon što uplati jednokratni iznos zaostale članarine.

Član 12. **(Odgovornost)**

(1) Ukoliko službenik ili drugo ovlašteno lice Islamske zajednice izvrši usluge suprotno odredbama ovog Pravilnika snosi materijalnu, disciplinsku i druge vrste odgovornosti po tom osnovu i dužni su nadoknaditi štetu Medžlisu koja nastane ne provođenjem odredaba ovog Pravilnika.

Član 13. **(Taksa za lica koja nisu izmirila svoje obaveze prema Medžlisu)**

(1) Lica koja nisu izmirila svoje obaveze prema Medžlisu u skladu sa odredbama ovog Pravilnika i posebnih akata Medžlisa, a traže usluge Medžlisa, dužni su prethodno uplatiti posebnu Taksu po ovom osnovu, druge obaveze po ovom Pravilniku i posebnim aktima Medžlisa i troškove usluge koju traže od Medžlisa.

(2) Visinu i način uplate takse iz stava (1) ovog člana utvrđuje Izvršni odbor Medžlisa posebnom odlukom najkasnije do kraja tekuće godine za svaku narednu godinu. Taksa ne može biti manja od članarine za 20 godina unazad po visini članarine u tekućoj godini.

(3) Sredstvima ostvarenim po osnovu uplate takse će se raspolagati u skladu sa finasijskim planom i budžetom Medžlisa i džemata.

(4) Za sva lica koja su obavezna plaćati članarinu u Medžlisu na osnovu odredbi ovog Pravilnika, a svoju članarinu plaćaju u nekom od džemata u Dijaspori ili u nekom od medžlisa u BiH mogu postati članovi Medžlisa uz predočenu dokumentaciju koja potvrđuje njihovo članstvo u nekom od džemata u Dijaspori ili medžlisa u BiH i plaćanje članarine za tekuću godinu.

(5) Da sva lica koja žele vjersku uslugu Medžlisa ili ukopa u vakufskim haremima na području Medžlisa, a nisu obavezu plaćanja članarine izvršila na području Medžlisa, već su članarinu plaćali u nekom od džemata u Dijaspori, ili u nekom drugom medžlisu u BiH, te nisu ni izdvajali jednomjesečnu ratu u matični džemat, isti su dužni uplatiti jednokratnu taksu kako bi stekli pravo na traženu uslugu.

(6) Visinu i način uplate takse iz stava (4) ovog člana utvrđuje Izvršni odbor Medžlisa posebnom odlukom najkasnije do kraja tekuće godine za svaku narednu godinu.

(7) Odredbe stava (1) i (2) ovog člana ne odnose se na pravo djece da pohađaju mektebsku nastavu u skladu sa općim aktima Islamske zajednice u Bosni i Hercegovini.

(8) Taksa važi samo za jedan konkretan slučaj

Član 14. **(Olakšice)**

(1) Od plaćanja članarine mogu biti oslobođena sljedeća lica:

a) lica teškog socijalnog statusa, koja taj status dokažu aktom izdatim od strane organa nadležnog za poslove socijalnog rada,

b) neuračunljive osobe,

c) lica koja nemaju poslovnu sposobnost i

d) lica koja nemaju nikakva primanja, a žive u zajedničkom domaćinstvu sa članom, svojom djecom, ili starateljem koji plaća članarinu.

e) lica koja žele svojim radom zamijeniti iznos članarine (košenje harema, uređivanje imovine IZ, održavanje džamija itd.) a nisu u stanju redovno plaćati istu.

- (2) Spisak lica iz stava (1) ovog člana utvrđuje nadležni džematski odbor najkasnije do kraja tekuće godine za narednu godinu.
- (3) Spisak iz stava (2) ovog člana obavezno se dostavlja Izvršnom odboru Medžlisa u roku od sedam dana od dana njegovog utvrđivanja.
- (4) Izvršni odbor može revidirati spisak lica oslobođenih od plaćanja članarine ukoliko utvrdi da je nadležni džematski odbor pogriješio prilikom sačinjavanja spiska ili ako se u međuvremenu okolnosti promijenu u smislu da navedena lica ispunjavaju uslove za plaćanje članarine.
- (5) Nijedno lice ne može biti oslobođeno plaćanja članarine suprotno odredbama ovog Pravilnika i posebnih akata Medžlisa.
- (6) Lica koja ostvaruju prihode po osnovu poljoprivredne djelatnosti ili druge samostalne djelatnosti i zanimanja ne mogu biti oslobođena od plaćanja članarine.
- (7) Lica koja raspolažu imovinom u svom vlasništvu a ne mogu plaćati članarinu mogu s Medžlisom sačiniti Ugovor o darivanju imovine u korist Medžlisa i džemata a za uzvrat biti oslobođena plaćanja članarine.
- (8) Ugovorom iz stava (7). Ovog člana mora precizno biti navedena sva imovina i prava i obaveze koje proističu iz Ugovora o darivanju.

DIO TREĆI – UTVRĐIVANJE IZNOSA ČLANARINE

Član 15. (Nadležnost)

- (1) Iznos članarine za cijelo područje Medžlisa utvrđuje Izvršni odbor Medžlisa posebnom odlukom u skladu sa odredbama ovog Pravilnika.

Član 16. (Rok za donošenje odluke)

- (1) Iznos članarine svojom odlukom utvrđuje Izvršni odbor prije početka svake kalendarske godine.
- (2) Na utvrđeni iznos članarine saglasnost daje nadležno muftijstvo.
- (3) Ukoliko se do kraja tekuće godine ne donese nova odluka o iznosu članarine, važeća odluka će se primjenjivati do donošenja nove odluke u skladu sa odredbama ovog Pravilnika.

Član 17. (Kriteriji za utvrđivanje iznosa članarine)

- (1) Izvršni odbor Medžlisa propisuje isti iznos članarine za sve obveznike na području cijelog Medžlisa.
- (2) Izvršni odbor može, prilikom utvrđivanja iznosa članarine, utvrditi kriterije za utvrđivanje iznosa članarine.

(3) Prilikom utvrđivanja kriterija za utvrđivanje iznosa članarine Izvršni odbor će primijeniti sljedeće elemente:

- a) socijalno – ekonomski stanje,
- b) važnost opstojanja džemata u punom kapacitetu,
- c) ostale elemente koji su značajni za utvrđivanje iznosa članarine.

Član 18. **(Najniži iznos članarine)**

(1) Nijedan obveznik članarine ne može platiti manji iznos od iznosa propisanog shodno odredbama ovog Pravilnika i drugih akata Medžlisa.

Član 19. **(Prihod)**

(1) Prihod ostvaren po osnovu članarine i drugih izvora shodno odredbama ovog Pravilnika predstavlja prihod Medžlisa i džemata i istim se raspolaže u skladu sa posebnim aktima, planovima, programima i potrebama Medžlisa.

(2) Izvršni odbor će nastojati da, prilikom donošenja odluke kojom će utvrditi iznos članarine, obezbijedi pretpostavke za obezbjeđenje dovoljnog iznosa sredstava za podmirivanje redovnih potreba i normalno funkcionisanje Medžlisa i džemata.

DIO ČETVRTI – PROVOĐENJE OVOG PRAVILNIKA I NADZOR NAD PRIMJENOM

Član 20. **(Provođenje)**

Za provođenje ovog Pravilnika odgovorni su organi, službenici Medžlisa, džematski odbori i drugi subjekti relevantni za provođenje odredaba ovog Pravilnika.

Član 21. **(Izrada registra obveznika)**

(1) Džematski odbori su dužni u roku od 12 mjeseci od dana stupanja na snagu ovog Pravilnika sačiniti registar obveznika plaćanja članarine Medžlisu i isti dostaviti Medžlisu.

(2) Na osnovu podataka iz stava (1) ovog člana Medžlis će, u roku od 60 dana od dana stupanja na snagu primjene ovog Pravilnika, sačiniti centralni registar obveznika plaćanja članarine shodno odredbama ovog Pravilnika.

Član 22.
(Nadzor nad primjenom)

- (1) Nadzor nad primjenom odredaba ovog Pravilnika vršit će Izvršni odbor Medžlisa.
- (2) Ako se, u smislu odredbe iz stava (1) ovog člana, utvrde nepravilnosti ili kršenje odredaba ovog Pravilnika, Izvršni odbor će preduzeti ili nadležnom organu predložiti preduzimanje odgovarajućih mjera u cilju ispravki nepravilnosti ili prestanka kršenja odredaba ovog Pravilnika.
- (3) U slučaju iz stava (2) ovog Pravilnika Izvršni odbor može izreći odgovarajuće mjere u skladu sa svojim ovlaštenjima, predložiti nadležnom organu izricanje tih mjera i tražiti namirenje počinjene štete Medžlisu usljed nepravilnosti ili kršenja odredaba ovog Pravilnika i tražiti svaku vrstu odgovornosti od počinioca tih radnji.

DIO PETI - REVIZIJA

Član 23.
(Revizija podataka o članstvu koji su važili do stupanja na snagu ovog Pravilnika)

Svi podaci o članstvu u Medžlisu (članske knjižice, spiskovi i slično) koji su važili do stupanja na snagu ovog Pravilnika podliježu reviziji.

Član 24.
(Usklađivanje podataka prema odredbama ovog Pravilnika)

Revizija shodno odredbama ovog Pravilnika obuhvata kontrolu podataka koji su predmet revizije u cilju pribavljanja podataka radi pravilnijeg sačinjavanja registra obveznika plaćanja članarine.

Član 25.
(Nadležnost za provođenje revizije)

- (1) Reviziju podataka o članstvu u Medžlisu provodi Izvršni odbor Medžlisa.
- (2) Za provođenje radnji iz stava (1) ovog člana Izvršni odbor može imenovati posebnu komisiju ako procijeni da će komisija navedene radnje izvršiti efikasnije.
- (3) Detaljniji postupak revizije propisat će Izvršni odbor Medžlisa posebnim aktom.

DIO ŠESTI - PRELAZNE I ZAVRŠNE ODREDBE

Član 26.
(Odluke džematskih odbora)

- (1) Džematski odbori mogu, uz saglasnost Izvršnog odbora, unutrašnje odnose regulirati svojim aktima koji moraju biti u skladu sa aktima Islamske zajednice, Medžlisa i drugim posebnim aktima.

(2) U slučaju donošenja akata iz stava (1) ovog člana džematski odbor je dužan isti dostaviti Medžlisu u roku od sedam dana od dana donošenja sa zahtjevom za davanje saglasnosti na isti.

(3) Izvršni odbor neće dati saglasnost na akt džematskog odbora ako utvrdi da isti nije usklađen sa aktima Medžlisa. U tom slučaju Izvršni odbor će naložiti džematskom odboru da otkloni utvrđene nepravilnosti u roku od 15 dana. Ako džematski odbor ne postupi prema nalogu Izvršnog odbora zahtjev za davanje saglasnosti na akt džematskog odbora će se odbiti.

(4) Ako Izvršni odbor Medžlisa da saglasnost na akt džematskog odbora u smislu odredaba ovog člana sva lica iz džemata i drugi relevantni subjekti dužni su poštivati akt džematskog odbora i postupati shodno odredbama istog.

(5) Džematski odbori će uz pismenu saglasnost Izvršnog odbora donijeti odluku o visini Takse za održavanje harema na svom području.

(6) Iznost iz stava 5. Ovog člana ne može biti manji od iznosa koji će svojom odlukom preporučiti Medžlis.

Član 27.

(Poziv svim obveznicima)

Medžlis će, u razumnom roku od dana stupanja na snagu ovog Pravilnika, svim obveznicima plaćanja članarine dostaviti poziv za učlanjenje shodno odredbama ovog Pravilnika

Član 28.

(Učlanjenje novih članova)

(1) Lica koja nisu članovi Medžlisa, a koji su obveznici plaćanja članarine shodno odredbama ovog Pravilnika, mogu se, u toku prve kalendarske godine nakon stupanja na snagu ovog Pravilnika, (2024. godina) učlaniti na način da uplate članarinu za prethodnu i za tekuću godinu.

Član 29.

(Propisivanje uslova za oslobađanje od plaćanja članarine)

(1) Izvršni odbor Medžlisa će, u roku od 90 dana od dana stupanja na snagu ovog Pravilnika, propisati uslove pod kojima neko može biti oslobođen od plaćanja članarine, koji moraju biti u skladu sa odredbama ovog Pravilnika.

(2) Prilikom utvrđivanja spiskova za oslobađanje od plaćanja članarine, džematski odbori i ostali subjekti dužni su postupati shodno uslovima iz stava (1) ovog člana.

Član 30.

(Primjena zatečenih akata)

Do donošenja provedbenih akata shodno odredbama ovog Pravilnika primjenjivat će se akti Medžlisa koji su bili na snazi prije donošenja ovog Pravilnika. Provedbenim aktom će se tačno propisati izgled i sadržaj članske knjižice, registra članova i evidencije o plaćanju.

Član 31.
(Status zatečenih članova)

Lica koja su redovno plaćala članarinu u skladu sa važećim aktima, stupanjem na snagu ovog Pravilnika stiču status člana Medžlisa u skladu sa odredbama ovog Pravilnika.

Član 32.
(Primjena odredaba ovog Pravilnika na druge subjekte)

Odredbe ovog Pravilnika odnose se i na lica zaposlena i na drugi način angažovana u Medžlisu

Član 33.
(Prestanak važenja)

Stupanjem na snagu ovog Pravilnika prestaje da važi prethodni Pravilnik o članstvu u Islamskoj zajednici Bosne i Hercegovine - Medžlis Islamske zajednice Bosanska Dubica.

Član 34.
(autentično tumačenje)

Autentično tumačenje odredaba ovog Pravilnika daje Izvršni odbor uz saglasnost Muftijstva banjalučkog.

Član 35.
(Stupanje na snagu)

Ovaj Pravilnik je stupio na snagu nakon što je na isti dobio saglasnost Muftijstva banjalučkog, a objavit će se na Oglasnoj ploči Medžlisa i oglasnim pločama džemata sa područja Medžlisa. Primjena ovog Pravilnika u punom kapacitetu počinje 01.03.2024. godine i primjenjivat će se u svim džematima Medžlisa.

Broj: 03-20/25
Datum: 01. 02. 2025

P R E D S J E D N I K
mr Amir Draganović